



東林書院

16
2693
11



門 16
2693
卷 11

澤研堂文集卷四十三

墓誌銘

嘉定錢大昕

昭和九年十二月十一日 購末

江西道監察御史王先生墓誌銘

先生姓王氏諱峻字次山號良齋蘇州常熟縣人大父
應祥父志學俱以先生貴贈文林郎翰林院編脩先生
少敏慧讀書數行俱下年十八補博士弟子才名籍甚
同里宋君玉才與先生最相善並受業於陳見復先生
一時稱為王宋既而入都以國學生應京兆試中雍正
元年 恩科舉人明年試授內閣中書尋登進士第改

翰林院庶吉士充一統志纂修官五年散館授編修七年典浙江鄉試十年典貴州鄉試乾隆元年典雲南鄉試先後甄拔號稱得人明年

詔開言路遴朝官有清望者俾居臺諫之職而先生以名史官改授江西道監察御史拜命三日卽抗章劾臺長官素行不叶人望罷之當是時先生直聲震都下先生感

上知遇能用言方具疏艸累數千言未及上而太夫人之訃至遂戴星而歸杜門養病者十餘年學益富品益高弟子著錄者日益衆當事爭延先生爲士子師於揚

王安定書院於徐主雲龍書院而於蘇之紫陽書院尤久以古學提唱後進所賞識後多知名性剛褊視時俗依阿齷齪畏蕙者流不欲姑與爲伍而人有一事一節之長則稱賞不置有三代直道之遺焉尤精地理之學談九州山川形勢曲折向背雖足跡所未到咸瞭如指掌嘗謂水經正文與注混淆欲一一釐正之而唐以後水道之變遷地名之同異酈注所未及者則撫正史及傳記小說近代志乘以補之名曰水經廣注手自屬藁未暇成也詩古文直抒性靈不加雕琢書法初宗北海後師東坡晚年自謂窺古人用筆之意所書碑碣盛行

吳下片楮隻字人知珍之先生壯年崇尚氣節慨然欲
有爲于世旣以病廢不欲出山則思見之著述而天不
假年未竟其業旣沒之後有與先生善者刻其所著良
齋詩文集若干卷行于世雖未足以盡先生亦略見先
生之概已先生久登清要不名一錢歸田後猶以教授
自給清風特操當於古人中求之春秋五十有八乾隆
十六年二月十七日終於里第家貧子弱久未克葬頃
歲季子淮安府桃源河務同知本智乞歸養母乃卜辛
亥歲臘月十四日葬先生於某鄉之原距先考塋若干
步遵遺命也配馮宜人教子有法今壽躋百齡康強逢

吉大吏入告行有旌門之榮子二人禮縣學生先卒本
智由盱眙知縣遷今官女一人壻朱聲孫□人□某官
大昕少而鈍拙無鄉曲譽先生聞其可與道古也薦之
使學於紫陽書院先生於諸生中最賞者屢三數人顧
獨稱大昕不去口先生歿垂四十年而大昕來主紫陽
遵守先生教規罔敢有懈先生之葬與執紼焉東漢墓
銘多由門生刊述俛仰今昔音容如存而衰老無成孤
負知已援筆泫然情見乎詞銘曰

尚湖之水清且直兮誰其似之夫子之德兮少可于俗
多師于古有所不爲合乎狷者孔翠以文鷹隼以威位

潘石堂文集 卷四十三 三
未酬德沒而名垂退之諛墓古人所譏先生之銘斯無
媿詞

翰林院侍讀邵先生墓誌銘

歲丙戌之秋翰林院侍讀太倉邵先生請告歸將出都
門諸與先生善者咸至其邸敘別先生素清羸善病年
未及耆輒有懸車之思嘗屬工畫者畫已小像取陰鏗
鈞晚欲收綸之句題曰收綸圖乞一時名流賦詩其高
致如此乃歸未及一載嬰疾遂不起嗚呼世方競于功
名而獨尚恬退其所取者廉矣宜不爲造物者之所忌
而亦斲之不得如志此又理之不可知者也先生諱嗣

宗字鴻歲別號蔚田先世居休寧號東門邵氏祖先光龍
始遷於太倉以潛德篤行稱考學詩本生考學易並以
先生貴 誥贈奉直大夫翰林院編修加三級先生幼
穎異在傅不勤年十八補博士弟子歲科兩試輒屈其
儕輩時同里毛先生宣夔亦以文名州人稱能文者必
首毛邵歲辛酉以選拔貢生舉本省鄉試壬申
聖母皇太后萬壽

特詔開科以秋八月會試主司海寧陳文勤公於闈中
得先生卷大賞異之手定第一及程墨出淳厚典重海
內翕然奉爲圭臬吾州自建治以來試禮部第一者明

代則陸太常欽王相國錫爵吳祭酒偉業 本朝百餘
年間惟先生而已 廷試 賜進士出身改庶吉士散
館授翰林院編修充 咸安宮官學總裁以病乞假假
滿補原官擢右春坊右中允轉左春坊左中允進翰林
院侍讀先生在詞垣十有餘年朝章典故咸所諳習分
修續文獻通考用力尤勤及

詔修宗室王公勲績表大學士劉公統勲委先生專司
其事舉凡起例較若列眉書成進 御深蒙 嘉獎僉
謂先生不去駸駸乎向用而先生以積勞致疾賦遂初
矣性耿介儼居宣武門外公退却掃終日門無雜賓分

校鄉會試各一分教庶吉士者三獎成後學循循不勸
自爲諸生常授徒自給既貴門弟子著錄益衆大都皆
束修自好之士或藉以標榜干進者則拒勿通也其教
子弟則曰君子持身無過廉儉二字不儉則不廉不廉
則無恥聞者以爲篤論所著詩曰一枝菴吟橐養餘齋
吟橐皆藏于家先生生於康熙四十九年八月二十六
日卒於乾隆三十二年閏月三日春秋五十有八配趙
宜人先卒子二人士潔士洙皆太學生女一人適乙酉
科副榜貢生王琬孫三人先生既沒之明年八月孤士
潔等奉匱葬於新塘之原以趙宜人祔禮也大昕以同

泮石堂文集卷四十三 五
郡後進與先生同在書局有年知先生之生平爲詳乃敘而銘之曰王毅公字文毅公墓志其女夫周行修而文映志芳而貌矍清而不絕乎俗貴而不易其初知止知足亦元亦儒貞石可泐嘉名弗渝

虛亭先生墓誌銘

外舅虛亭先生之葬以乾隆四十四年十一月二十一日先期西莊鶴溪使來告曰先文毅公墓志其女夫周益公實爲之文今先君子井椁旣卜援吾家故事屬銘於子大昕曰以益公之文猶不自名而託張真甫名況庸下如大昕者夫何敢頓首固辭不獲已乃泫然出涕

敘之曰先生諱爾達字通侯號虛亭姓王氏先世與宋太尉魏國文正公旦同出文正從子元始居崑山縣之新漕里數傳至左朝請大夫崇政殿說書葆卽文毅公文毅九傳至明監察御史遜遜子復亦官監察御史小御史之曾孫國子監司業同祖司業生處士逢年竝知名前代先生曾祖在畿縣學生是惟處士之孫祖鎮圭皇贈修職郎考焜康熙丙子舉人丹徒縣儒學教諭贈通議大夫通議始卜居嘉定而先生猶以新陽籍應試新陽本崑山析置示不忘本也先生同產四人齒最居少事通議孝謹無違通議官丹徒獨攜先生自隨

依倚如左右手伯兄蚤歿與邱嫂同居終身無間言叔
兄素失愛於通議銜憾數加陵侮先生受之無忤色鄉
黨稱道焉性疎直易怒亦易解嘗面斥人過頰項皆赤
少選復與啁啾好語忘其人之蓄怨也平生不善治產
往往盡無斗儲然吟詠未嘗輟遇極作惡事姑置之或
隱几坐須臾熟寐醒後復不復記矣讀書好瀏覽不爲
章句學弱冠後補博士員試輒冠其等食廩餼爲諸生
祭酒屢試行省不見讎中歲以後乃專意於教子以爲
文章者不朽之盛事科舉之學非可以傳後也故導之
以詩古文又以爲詞章之學可以潤身未可以言道故

進之以經學近三十年來東南士大夫言古學多推嘉
定而嘉定之好古學自王氏始西莊旣貴先生優游林
園日手一編不置或招朋舊爲真率會斗酒脫粟無異
老儒好作詩以放翁後山爲師寓意目前多自得之趣
書法險勁不肖作圓輒態春秋七十有六以乾隆三十
三年五月二十八日捐館 誥封通議大夫光祿寺卿
加一級夫人朱氏江寧府儒學訓導金銓之女 誥封
淑人先五年卒事尊章甚孝處約而好施先生之家事
治繫淑人是賴先生有賢子二人長鳴盛甲戌進士第
二人及第官至內閣學士兼禮部侍郎左遷光祿寺卿

學者稱西莊先生次鳴韶新陽縣學生號鶴溪子女子
二人長適縣學生顧我澍季卽大昕妻孫男女若干人
大昕年十五應童子試先生亟賞其文西莊亦謂子可
與其學因許以愛女招爲館甥嘗言李彥平范致能周
子充皆吾先世門壻所以期許甚厚先生好譽兒又兼
譽予人或笑之則曰久當信我言今荏苒四十年文稍
有名而德不加修九原可作媿其曷勝銘曰

學不必用蘊而益純古訓是式以遺後人豈惟後人邑
中之彥聞其風者古學大闡夏駕之西車塘之原宰木
鬱狀四尺新阡太邱壇耶老翁泉耶君子之澤終勿諼

耶

中書舍人吳君墓誌銘

乾隆十有六年春

車駕巡幸江浙觀民設教典禮畢舉士大夫作爲歌頌
獻之 行在

天子命江浙學政選其優者召試而親甲乙之於浙江
得士三人曰嘉善謝墉崑城錢塘陳鴻寶位人秀水王
又曾穀原於江南得士六人曰懷寧蔣雍植秦樹全椒
吳煥荀叔長洲褚寅亮增升休寧吳志鴻沁可常熟孫
夢達中伯而予以謏劣亦與數中有

詔之九人者皆授以內閣中書舍人之職中書故稱清
望官亞於詞林非由科甲出身者不得與九人之中惟
中伯已登進士其八人皆諸生也

特賜之舉人俾得應禮部試天下莫不榮此九人者謂
制科以來未有此曠典也諸人既受命以是歲先後入
京僦直內閣獨予與摺升沁可以明歲始至而沁可之
至又在後與之言端重而愿慤介然有所守君子人也
其六月置酒於崑城寓邸九人者皆至痛飲甚樂嗣後
或一月或半月輒小集中書舍人例閒三日一入直閱
十日則持被宿于直廬它日無事則相從談詩文雜以

談嘲泥酒取飲蓋無日無之也既而崑城以進士入翰
林中伯遷宗人府主事兩人蹤跡少疎又二年予與穀
原同登進士予承乏詞館穀原改官禮部未幾乞假去
而荀叔亦移疾去偶以公暇過諸君談諧泥飲如平時
然較之往日差希矣又三年沁可歿于京邸予入哭盡
哀九人之中遽摧其一痛逝者之不可作蓋慨然有聚
散之感也又五年穀原訃至遙設位哭之又一年復哭
中伯于京邸同時來唁者惟崑城秦樹及予三人而已
嗟呼彈指十餘年間聚首歡宴歷歷如昨日而死者三
之一其他或聚或散如風中萍來去靡定欲求曩者高

會之盛邈如隔世悲夫沁可休寧人僑居蕪湖生於康熙五十七年某月日歿於乾隆二十二年某月日春秋四十配某氏沁可未歿之前十日子過其寓齋沁可課幼女讀唐人絕句詩略能上口令拜子作男子揖世俗言以此厭無子也沁可長于小篆工刻私印好作詩嘗與子在 圓明園直廬聯句賦冰茶數十韻頗爲好事者所傳云銘曰
古今才人患不達一經皓首困帖括
省方召試求真才親收九人君其一文苑傳選舉志君之名垂奕世

翰林院檢討毛君墓誌銘

君諱式玉字伊人乾隆六年以諸生舉于鄉又十一年試禮部中式又二年 廷試 賜同進士出身改庶吉士又三年授翰林院檢討又一年 御試詞臣君名入三等以本官致仕又三年

天子幸五臺山君獻詩 行在稱

旨仍以本官召是歲某月某日卒於官年口十有口惟毛氏世占籍萊州府之掖縣自明以來世爲簪纓甲族父貢官潁州知州祖霏曾祖偉皆以潁州貴贈如其官階奉直大夫妻李孺人繼妻單孺人子某君貌皙而羸

望之如不勝衣叩其學淵然不竭家無甌石儲而聚書多善本好爲古文嗜金石刻以翰林歸田日嘗騎驢裹糧入天柱山徧拓元魏高齊碑道旁觀者不知其爲貴人也初入詞垣讀國書不數月悉究其旨強記絕人同輩就君質所疑各如其意以去少詹事德爾泰公分教國書歎曰今之巴克什也居京師不與要人往來閉門却掃人莫窺其際葬以某年月日同年生嘉定錢大昕爲之銘銘曰
稷下談士急功喜夸君獨恂恂與古爲徒再入承明不爲數奇文而不年天乎何尤

封榮祿大夫內閣學士兼禮部侍郎加二級前翰林院庶吉士內閣典籍尹公墓誌銘

乾隆五十年正月

天子詔舉

聖祖皇帝宴千叟故事集王大臣官員士民年六十以上者 錫宴 乾清宮於時 誥封榮祿大夫前內閣典籍蒙自尹公以就養京邸 特准入宴與一品大臣列坐丹墀東 天顏咫尺仰瞻 溫霽禮畢捧所賜杯盤以出復 賜靈壽杖如意數珠貂皮文綺諸物異數優渥朝野歎

漢石堂文集 卷四十三
一
羨公籍隸滇南距京師萬里又久辭朝簿得預嘉會洵
千載一時也越二年九月乙丑朔終於京邸春秋七十
有三長子內閣學士壯圖扶櫬南歸縵經踵門述公遺
言屬子文其誌石嗚呼公予同年友也俯仰三十餘年
升沈零落觸緒增感公與予皆寡交而獨以行誼相取
子歸田十載朋舊多不通尺牘惟公與曹宗丞慕堂緘
問不絕自公云亡慕堂繼逝而予益無賴矣桑德之詞
其何敢辭公諱均字佐平先世河南懷慶人明兵科給
事中革以言事謫雲南太和縣丞因占籍蒙自曾大父
若時明季諸生大父文熾康熙丁卯舉人兵部主事父

宗梁康熙丁酉舉人廣西桂林府同知兩世皆 誥贈
榮祿大夫妣皆一品夫人公幼入小學卽不逐童兒嬉
戲每家慶徵歌演劇常挾冊獨坐一室中年十九補縣
學生歲科試輒冠其偶癸酉秋鄉試主司於遺卷中得
公卷大奇之遂與鄉薦明年成進士選翰林院庶吉士
又三年散館仍歸進士班乃援河工例改選內閣中書
未及補而丁內艱服闋入都又久之始得缺在職九載
執事勤恪以俸次轉典籍記名以主事用丁酉歲京察
以年老去職時閣學已官御史就養子舍灑然自得初
封朝議大夫江南道御史加二級再封通議大夫太僕

寺少卿加二級三封榮祿大夫內閣學士加二級公之
初登第也向例釋褐進士先由王大臣揀選以備館職
是科雲南入選僅建水倪君高甲一人及引見
上顧閣臣曰尹某勝於倪多矣何以不在選中遂得預
館選既而倪君由吏部擢監司公尚踴躍仕路人咸以
爲數奇及晚年階封一品康強逢吉乃信

聖天子鑒賞自有真也公事親孝父殯松皋去城六七
里公結廬殯側三載晝歸侍太夫人暮則返倚廬雖寒
暑雨雪無間因自號松皋居士及奉太夫人合葬適大
雷雨匠役皆走避公撫棺危立不迨寸步羣從子弟亦

罔敢離次踰時雨止遂克成禮昆弟五人門無異財視
昆弟之子如己出節縮俸入以葺宗祠經畫井井可垂
永久生平最惜物力自奉極淡泊而篤於故舊慷慨無
少吝爲諸生時應秋試中途遇故人物故卽解囊爲治
殯斂留一日乃行官京師日鄉前輩通政楊公如松病
革適其子以事被逮其子婦扣門告以急難公亟偕醫
往楊已不起卽爲理喪具并轉屬刑部保釋其子俾就
苦次楚雄王貢生鎬臥病逆旅已劇公往視之泣以後
事相託公令迨至已寓延醫治之數月而痊鎬感泣請
受業爲弟子鄉人落魄無所依及旅櫬未返者輒爲區

畫得生還歸葬者甚多好飲豆湯每月必命數設呼子
若孫共啖曰此吾鄉味若曹卽富貴慎勿忘也公與閣
學同官京師父子入直常共載一車諸城劉文正公聞
而歎曰尹舍人可謂以清白遺子孫矣夫人伍氏戶部
員外郎士祺之孫女貢生正期之女淑慎明達白首相
敬累封一品夫人子五人壯圖乾隆丙戌進士今爲內
閣學士兼禮部侍郎會圖增廣生全圖廩貢生慶圖健
圖皆國學生女二人壻曰楊雲官曰伍東垣孫男十四
人孫女九人銘曰

易稱積善家慶有餘黃金盈籩不如詩書於維榮祿如

漢萬石不言躬行德隅抑抑文章派別一家所師科第
拾芥爲國羽儀清華之選世重館閣公皆履之依然瓠
落南山有橋本固枝繇過庭貽訓爰大其門承歡廿載
就養左右熙熙怡怡齊眉皓首紫泥申錫一品班崇考
甫是則三命滋恭

帝有恩言錫宴千叟公預其間稽首拜手手捧上尊徐
步 天衢又何錫之鳩杖數珠矍鑠斯翁觀者屬目何
以致之義方之勛人生三寶曰儉與慈不爲物先公實
兼持易簣之辰神明未昧屈指舊游尚及吾輩素車萬
里歸于松楸諸孤攀號泣血紛流溪谷有遷令聞難沫

潘石堂文集 卷四十三
同心之言俾勒幽室

日講起居注官翰林院侍講學士曹君墓誌銘
翰林院侍講學士曹君習菴予同里總角交也君之高
祖母予曾祖姑而予曾祖母則君高祖姑君之尊人檀
澹公爲先大父入室弟子予又受業於檀澹公君少於
予三歲相視若昆弟然已而同客吳門先後以

召試通籍又同在詞館應制詩文互相商榷游覽宴
集出入必偕者蓋四十年予視學東粵僅半載奉諱歸
里遂不復出又十餘年習菴亦視學於粵臨行貽書告
予謂任滿日當乞養南歸相從尋山水之盟乃到任僅

半載奉太夫人之諱馴至不起嗚呼當代失一大手筆
聞者無不盡傷況交親至厚如予者乎孤子臣晟以誌
銘見屬誼不可辭君諱仁虎字來應別號習菴本姓杭
氏世居嘉定之周公邨十世祖維德幼孤依母氏居外
家子孫因以曹爲氏五世祖元嘏移居城西之外岡高
祖國正贈武德將軍曾祖錫命康熙壬戌武進士湖廣
撫標中營游擊祖源歲貢生以君貴累贈中憲大夫始
移居縣城父檀澹公文行爲士林推重弟子著錄最盛
歲貢生候選訓導以君貴誥封奉直大夫晉贈中
憲大夫母程氏累封太恭人君少而好學沈靜不妄出

一語而於所讀書悉能貫串同邑王君鳴盛少負才俯視儕輩獨偁君與子爲二友年十六補博士弟子學使蒲州崔公紀有奇才之目中丞覺羅雅公樗亭選高才入紫陽書院肄業州縣以君名應時青浦王君昶與子亦同入院三人者食則同爨夜則聯牀而長洲吳君泰來上海趙君文哲及王君鳴盛數過從相與鏃厲爲古學君在院尤久院長沈文愨公數稱其詩學使寧化雷公鉉舉君優行乾隆二十二年
聖駕南巡君獻賦 行在
召試列一等

特賜舉人授內閣中書倬直之暇刻意吟咏未嘗造請貴游二十六年成進士改翰林院庶吉士散館授編修君詞賦久爲海內傳誦及在禁林每遇大禮高文典冊多出其手館閣代言之文院長輒委屬艸皆典重清切宜古宜今擢右春坊右中允充 日講起居注官扈蹕盤山有奉

敕賡和諸作遷翰林院侍講轉侍讀進右春坊右庶子擢侍講學士五十一年奉 命視學廣東與平少詹恕交代少詹爲諸生時嘗受業於君粵人傳爲美談明年程太恭人終於官署君方按

潘石堂文集卷四十三
試連州不及視含殮聞訃晝夜號泣甫而月竟以毀卒
時乾隆五十二年八月八日距生於雍正九年五月五
日春秋五十有七娶陸氏繼娶申氏董氏皆前卒子臣
晟女二人君起家儒素以文字受
主知久列承明著作之廷京察常居一等兩遇

大考皆列二等教習庶吉士凡七科前後典鄉試者二
分校順天鄉試者一分校會試者三總裁武會試者一
後進得其品題便成佳士舟車所至乞詩文者屢滿戶
外博極羣書精於證據詩宗三唐而神明變化一洗粗
率佻巧之陋格律醇雅醞釀深厚卓然爲一時宗少時

與王吳趙諸君唱酬彙刻其詩流傳海船日本國相以
餅金購之在京華與館閣諸同好及同年友爲詩社率
旬日一集或分題或聯句或分體每一篇出傳誦日下
今所傳刻燭炙視二集是也其事二親孝所得俸錢分
寄諸弟無私藏焉所著詩有宛委山房春槃瑤華倡和
秦中雜稿轅韶鳴春諸集又有蓉鏡堂文稿二十四氣
七十二候攷轉注古音攷學士在唐宋時預聞機密今
則專以文字爲職然亦惟鴻筆麗藻斯與職稱學優如
君其不謂之眞學士也夫銘曰
威鳳五采鳴于朝陽詞臣報國厥惟文章漢廷枚馬鄴

下陳王詩歌元白制誥常楊慶歷歐梅元祐蘇黃虞楊
范揭高楊徐張淵哉若人文苑之英名位未極令聞不
忘誰其銘之疇昔鴈行竹林路杳懸河淚滂

李南澗墓誌銘

己卯之秋予奉

命主山東鄉試得益都李子南澗天下才也填榜日按
察沈公廷芳在座起揖賀予得人越三日南澗投刺請
見與語竟日所見益奇於所聞南澗與人交有終始雖
交滿天下獨喜就予在京都日相過從其歸里也每越
月逾時手書必至得古書碑刻或訪一奇士必以告及

出宰劇縣在七千里之外奔走瘴癘簿書填委而書問
未嘗輟覩縷千百言從不假手幕客予嘗夢遊南澗官
齋覺而書至意甚異之殆所謂同氣相求者去歲南澗
自粵西貽予書言生癰於尻甚劇自後久不得音問又
數感惡夢今冬其弟文濤使來告曰吾兄以去年八月
四日病癰終於官舍遺命不作行狀以自編年譜乞先
生銘其墓嗚呼南澗果死矣世豈復有此才哉南澗諱
文藻字素伯一字蒞畹晚又號南澗先世自棗強遷益
都之春牛街祖元盛父遠皆以南澗貴贈如其官南澗
天姿俊朗年十三從父遊曹家亭子作一記仿赤壁賦

已有思致十五學爲詩二十一補縣學生好博覽今古
不爲世俗之學所至必交其賢豪長者旣以第二人舉
鄉薦明年會試中式又明年成進士 廷對策博瞻爲
進士最以補試例不與進呈之列然讀卷官交口歎賞
無異詞久之謁選得廣東恩平縣知縣到任後奉檄署
新安縣又奏調潮陽縣知縣以海疆三年俸滿保薦擢
廣西桂林府同知未及一年而沒其居官以清白強幹
稱嶺南俗多竊牛牛皮色相似雖獲盜多不承有司無
如之何南澗始至今有牛之家各於牛角印烙私記凡
赴墟賣牛者牙儉以印烙登簿以印付買主如告失牛

先以印呈官官遣役持印驗墟簿無得隱者大府善其
法下所部行之陽江民劉維邦以母病延道士作法借
鄰人刀十柄縛梯上以驅祟吏索錢不遂取刀送縣誣
以不軌南澗奉檄往勘廉得其實白於上官釋之未幾
陽江令以它事被劾銜南澗甚遣親信僕潛至恩平欲
探陰事中傷之居兩月無所得乃已潮陽民好械鬪往
往殺傷多人南澗至則懸鉦於堂上有將鬪者令地保
馳入城擊鉦以告立往拘治衆則散矣自是械鬪稍息
縣故有東山書院延進士鄭安道爲師購經史子集數
十種以教學者潮陽與海陽揭陽俗稱三陽仕其地者

清石堂文集卷四十三
多致富南澗去官之日囊橐蕭然還至番禺命工摹光
孝寺貫休畫羅漢四軸以歸曰此吾廣南宦橐也性好
聚書每入肆見異書輒典衣取債致之又從友朋借鈔
藏書數萬卷皆手自讐校無輒近俚俗之本於金石刻
搜羅尤富所過學宮寺觀巖洞崖壁必停驂周覽有僕
劉福者善椎拓攜紙墨以從有所得則畫搨之嘗乘舟
出迎總督小憩南海廟命僕拓碑秉燭竟夜比曉問總
督舟已過矣其詩古文皆自攜所見不傍人門戶視近
代模擬膚淺以爲大家蔑如也然口不道前輩之短以
爲非盛德事過嶺後治公事日不暇給而詩益工郵亭

僧院信筆留題雖與隸皆知爲才子也生平樂道人之
善鄉先正詩文可傳者必撰次表章之元和惠定宇發
源江慎修皆素未相識訪其遺書刊行之德州梁鴻翥
窮老而篤學月必誦九經一過鄉里咸目爲癡南澗一
見奇之爲之延譽遂知名於世其在嶺表士子以文就
質無虛日獨稱欽州馮敏昌順德胡亦常張錦芳作嶺
南三子歌其獎借後進誠有味乎言之也子嘗戲論南
澗有三反長身多髯赳赳如千夫長而胸有萬卷書一
也生長於北海官於南海二也湛思著書欲以文學顯
而世稱其政事三也嗟乎以南澗居家之孝友當官之

清神堂文集卷四十三
廉幹與友之誠信固已加人一等乃其所篤嗜者文章也文人之病恒在驕與吝而南澗獨否使其得志必能使古之文士有以永其傳今之文士不致失其所而竟不遂此吾所以爲斯世惜也悲夫悲夫南澗娶邢氏先卒繼室周氏生子三人章郵章棉章姚俱幼女子三人
銘曰

偉哉李生文中之雄兮四部七略羅心胸兮名登甲科官至五品不爲不庸兮胡爲不與石渠蘭臺之選以昌其文乃以能吏終兮昔裴幾原自占死期不過戊戌歲任彥升常恐不過五十果四十九而云逝嗟哉李生年

壽適與同兮恒幹不可留修名永無窮兮廣固之里宰木翳如千秋萬歲過者下馬曰才子之幽宮兮

日講起居注官翰林院侍講學士邵君墓誌銘
嘉慶紀元之春餘姚邵君二雲自左庶子擢翰林院侍講學士兼文淵閣直閣事君以懿文碩學知名海內及被召入四庫館總裁倚爲左右手朝廷大著作咸預討論每經進書籍九重未嘗不稱善迺翔清署二十有餘年至是始轉四品乃以編書積勞成疾疾且愈矣醫者誤投藥遂不起實六月十五日春秋五十有四訃至吳下予爲位哭之慟因憶乙酉秋予奉

命典試浙右靳取奇士不爲俗學者君名在第四五策
博洽冠場僉謂非老宿不辦及來謁纔逾弱冠叩其學
淵乎不竭予拊掌曰不負此行矣越六年禮部會試第
一賜進士出身乾隆三十八年有
詔編次四庫書思得如劉向揚雄者用之宰相首以君
名入告召赴闕除翰林院庶吉士充纂修官逾年
授編修久之
御試翰詹諸臣君名列二等遷右中允四轉而至今職
嘗預修國史
萬壽盛典八旗通志校勘石經春秋三傳由文淵閣

校理進直閣事充日講起居注官總裁咸安宮官
學提調國史典鄉試者一教習庶吉士者再階由儒
林郎至中議大夫君少多病左目微眚清羸如不勝衣
而獨善讀書數行俱下寒暑舟車未嘗頃刻輟業於四
部七錄無不研究而非法之書弗陳于側嘗謂爾雅者
六藝之津梁而邢叔明疏淺陋不稱乃別爲正義以郭
景純爲宗而兼采舍人樊劉李孫諸家郭有未詳者據
它書補之凡三四易稿而始定今承學之士多舍邢而
從邵矣自歐陽公五代史出而薛氏舊史廢獨永樂大
典采此書君在館會粹編次其闕者采冊府元龜諸書

補之由是薛史復傳人間予嘗論宋史紀傳南渡不如
東都之有法寧宗以後又不如前三朝之粗備微特事
迹不完卽褒貶亦失實君聞而善之乃撰南都事略以
續王傅之書詞簡事增過正史遠甚畢尚書沅續宋元
通鑑常就君商榷輒歎曰今之道原貢甫也君生長浙
東習聞鼓山南雷諸先生緒論於明季朋黨奄寺亂政
及唐魯二王起兵本末只講手畫往往出于正史之外
自君謝世而南江文獻無可徵矣君所著又有孟子述
義穀梁正義韓詩內傳攷一皇朝大臣謚述錄輶軒日
記皆實事求是有益于學者君至性過人事親喪葬盡

禮篤于故舊久要不忘性狷介不踏權要之門以教授
生徒自給退食之暇執經者環侍左右君隨問曲諭人
人皆得其意君亦以師道自任莫敢以非義干者詩文
操筆立就淵博奧衍自成門戶有南江詩文稿君諱晉
涵字與桐二雲其號大父向榮康熙壬辰進士父佳銳
增廣生皆以君貴 贈中憲大夫元配□恭人子秉恒
秉華卜葬君子某鄉某原先期來請銘於戲自四庫館
開而士大夫始重經史之學言經學則推戴吉士震言
史學則推君君於國史當在儒林文苑之列朝野無間
言而知之最先者予也予比歲衰病嘗預戒兒輩必求

二雲銘我孰意天寔祝予轉以才盡之筆納君穿中也此所以泣然而失聲也銘曰
翰林文苑之區陳規
浩洽南江導源岷山厥生名儒特立絕羣陽明以功黎
洲以文誰與參之其在二雲名冠南宮書校東觀為真
學士為良史官槐鼎何慕竹帛常尊著書滿家自信千
年古三不朽言其一焉溝滄易涸視此原泉

潛研堂文集卷四十三 門人袁廷禱校字

潛研堂文集卷四十四

嘉定錢大昕

墓志銘二

山東曹州府桃源同知彭君墓志銘

致政兵部尚書長洲彭公之冢嗣山東曹州府桃源同知諱紹謙乾隆三十六年請假省覲以公年高假滿遂不出越四年以疾終於葑門里第尚書公諸子皆賢而文而桃源於家為令子於官為循吏德優而未盡施其歿也公哭之慟而親故僚友靡不盡傷越丁酉歲十一月丁丑卜葬於吳縣十二都下六尚雅宜山下即元配

淮東先生集卷之四
一
繆宜人之塋而合祔焉先期嗣子希韓述事狀乞大昕
爲之銘曰
彭氏之先實始江西明初徙吳科第蟬聯維高大父
皇朝進士作宰長寧文與行脩生子修撰首舉南宮廷
對第一以待講終侍講之子鄉飲大賓光祿大夫
錫封紫宸實生尙書會狀兩元踵乃祖躅近古罕倫
官躋一品未耄歸田詔列九老賜遊香山五
丈夫子君爲長兄厥諱紹謙字之濟光幼順乎親左右
就養讀書萬卷瞭若指掌丁卯鄉舉仲弟同登再黜禮
部乃就銓衡詔往試哉作令於東初攝陽穀秋漲

暴衝親往督振以蘇乏窮里正地方按戶籍充吏不假
手民以爲公後失其法乃至訟凶假牧平度移攝荏平
奄遘內憂犇號戴星中月禫除起知新城湖墾窪下地
棄不畊假民子種秔稻是執計頃百餘灌溉用利青沙
之泊設隄爲防曰彭公堤民永不忘在官三載改治汶
上
鑿輅時巡供頓無曠南旺之西有宋家窪水潦
所瀦廢爲汙萊久議宣洩恐妨下游羣口附和築舍道
謀君規隄南故河可䟽折而南出微山諸湖以鋪水法
廣深積筭下游所受長不盈寸繪圖上府大吏允諧六
旬畢工厥利溥哉成賦之地三千頃餘昔委巨浸今稱

上腴丙戌秋霖水溢禾稼申請振卹民無饑者大府考績以卓異舉保甲令行姦無容所他盜入境詰而擒之詔特引 見擢遷同知曹州桃源毗連宋魯以君分治爲劇郡輔姻親引嫌循例改補乞假覲省一堂春煦晨昏子舍養日方長五十而慕樂未渠央五十有一百歲甫半孟冬下旬邁疾捐館伯子希韓次日希曾希彥希仲叔季相承伯也舉鄉校書 武英女子子六咸締簪緙夫人繆氏庶常之子洗馬之孫相敬以禮善事君姑宜於築里螽斯繩繩戚鄰稱義先歿八載卜葬斯阡今開厥兆合祔宜焉疆圉作謠歲十一月丁丑既望筮

云其吉惟君孝友施於有政敦族全交言必顧行閑家一編以代庭誥非苟知之亦已允蹈 帝眷吏治謂宜顯揚才而不年未旣所藏羸博之葬誰能忘情述銘慰公百世有徵

湖北荆宜施道前翰林院修撰陳公墓志銘

乾隆五十有二年六月二十七日湖北荆宜施道前翰林院修撰陳公永齋卒於里第春秋五十有一越三年將卜葬於吳縣某鄉九世祖僖敏公賜塋之旁先期公之仲弟中書舍人希哲屬子志其墓石蔣上舍業咸亦爲之請乃按故兵部侍郎蔣公元益所述家傳敘次之

公諱初哲字在初別號永齋世居蘇州之吳縣自僖敏
公以文學經濟歷官都察院左都御史爲明正統中名
臣厥後代有文學隱而未曜曾大父元揚好善能教其
子大父震品學醇厚從故學士何義門先生游號爲入
室弟子贈中憲大夫父樹勳博通古今沈毅闊達以國
學生游秦閩間公卿皆折節延爲上客相國尹文端公
總督兩江尤器重之嘗語人曰立巖有體有用人也以
公貴封中憲大夫公幼有異稟弱冠已負文譽補元和
縣學生乾隆二十五年舉鄉試益潛修古學與仲弟希
哲以詞賦相淬厲吳中有二陳之目三十年

聖駕南巡昆弟竝以獻賦 召試行在仲弟名列高
等授內閣中書而公以論誤寫一字置乙等亦得文綺
之 賜二十四年會試中式 廷試條對詳贍纏
纏千餘言而書法尤端重不苟讀卷大臣擬列第二
上嘉其切直 特擢第一元和分縣以來登狀元者自
公始而封君與王太恭人具慶在堂年未及耆鄉閭誇
爲盛事授翰林院修撰分習 國書公一過目卽曉其
竅要閱二年散館復列第一 上喜曰漢人中不易有此尋充方略館纂修官入直
武英殿兼協修 起居注益以勤慎稱三十八年 詔

開四庫館公復與修纂每校一書畢卽條其撰述本旨
評論當否悉中冑縻時館臣例得薦騰錄生數人公所
舉皆寒素士總裁諸城劉文正公新建裴文達公咸歎
其公正尋充文淵閣校理再充會試同考官一充陝
西鄉試正考官兩遇京察俱列一等四十三年
特授湖北荆宜施道甫莅任遇歲歉卽捐廉以振饑者
明年汀水暴漲溢沙市隄公令吏民載土囊權塞之親
履隄上督視晝夜水漸退民居得無恙又明年出俸
錢加築隄益以固歲旱依春秋籛露祈雨法又步禱
龍神廟兩應時降荊州向有權關使者歲一更易稅額

屢缺上令裁去以大吏兼轄督撫奏公領其事檢
束吏役勿分外需索稅額旣足商民亦無怨言四十八
年丁王太恭人憂奔喪旋里越二年又丁封君憂殯斂
之禮壹遵古法故宅在城東隅公與仲弟各拓數楹以
爲封君娛老之地至是遵遺命悉以讓季弟同哲而各
買新宅公所居在古雪街於屋旁築樓三間擬奉先人
粟主爲家祠而庭中稍置坡石顏曰小蓬瀛有栖心物
外之志工垂成而奄忽下世悲夫國初詞臣沿明舊
制凡進士第一人無外用者

今天子慎重吏治內外一體遂有以大魁而授監司者

自會稽梁公國治鎮洋畢公沅及公而三然兩公皆曾
轉坊局公直以修撰得之以是知

上之將大用公而銜恤痛淡旋復摧折此朝野所深惜
者也公初娶張恭人壬申舉人鵬之女早卒繼娶蔣恭
人例贈奉政大夫仙根之女善文翰庀內外事甚飭人
以爲得賢內助子兆雄早卒次兆炎孫若芝俱幼公以
儒學登上第而內行淳備孝友任郵人無閒言家居不
喜與長吏還往亦不臧否人物遇故舊謙抑自下識度
宏遠人莫窺其際詩文冲和恬雅似其爲人書法似顏
魯公晚年不輕下筆友朋得其寸楮爭藏弄之銘曰

鳳翔千仞鵬搏九霄毛羽旣成攬身最高木天芸閣珠
玉揮豪匪惟文章經濟克劭盤根錯節小試孟勞霖雨
一滴膏澤崇朝溫飽匪志行誼足式歷試無玷斯爲全
德天不假年中道而息大名旣成遑爭晷刻鬱鬱佳城
僖敏之側青松白雲垂聲無極

贈儒林郎刑部雲南司小京官加一級補瓢韓
先生墓志銘

吳中文獻之家首推雲東韓氏二百年來文采風流照
映藝林振振公姓人各有集非徒以膏粱華腴炫世俗
也補瓢先生諱騏字其武實文懿公之從子被服儒素

潛研堂文集 卷四
學有師法五歲能辨四聲始入塾聽伯姊誦唐人詩默
記不失一字師大驚曰異日風雅材也長而記誦闕博
爲文下筆立成顧俠君太史一見奇之呼爲小友巡撫
儀封張清恪公課士紫陽書院擢賓第一在庠序名稱
籍甚朕淡于榮利恥爲俗學好吟詠恬淡真率一以陶
謝爲師春秋佳日招朋舊賦詩飲酒戶外之屨恒滿晚
歲學益純邃嘗製補瓢歌云志士勤補拙學人善補過
老夫志短學亦荒但補山瓢惜瓢破亦近于有道之言
矣其事親有禮居父憂年已五十一矣三年處外過時
而哀從子暢蚤失怙恃親撫育之以至成立治家嚴肅

博奕之具不陳於側乾隆十九年九月下旬捐館春秋
六十有一初娶王安人再娶顧安人皆早卒三娶陳安
人後二十七年乃卒教子孫必登于禮法鄉黨稱賢母
焉子二人鍵歲貢生議敘通判是升附監生敕封儒林
郎女三人壻程遵義畢楚玉蔣曾燧孫男壽附監生崧
廩膳生對丁酉選拔貢生特授刑部雲南司七品官崧
巖俱幼先生歿之二年卜葬吳縣香山祖塋之右又二
十四年以孫崧貴 馳贈儒林郎又三年將奉陳安人
之匱啟先生窆而祔焉先期是升屬其子崧乞予銘予
少從先生游得與忘年交之列先生儀觀豐偉多識掌

故與談鄉先哲軼事娓娓不絕羣從多以科第得官獨
躋登無所遇狀身歿而名益彰詩文流播人口且有文
孫登朝 綸章寵錫賁及重泉古人云第五之名何減
驃騎由今觀之蓋有過之無不及也銘曰

吳之巨族雲和韓濟生種德啟後人後先宗伯名大振
公之王父尉俊倫觝排馬阮幾邁屯鄉人表德稱貞文
厥考樂志大耋臻鄉飲五豆領衆賓先生早充博士員
晚乃循例貢成均孝乎惟孝溫清勤頤神典索樞衡門
詩詞脫手無垢氛石田磬室堪比肩舜世卅載名未湮
江湖有集萬口傳有子若孫才軼羣贈階六品官白雲

松楸鬱鬱香山原如防如屋四尺墳文苑耆舊其人存

內閣中書舍人邵君松阿墓志銘

常熟邵氏當

高宗朝昆弟四人先後入館閣並以才名傾動日下論
者比諸唐京兆竇氏宋鄱陽洪氏明吳郡皇甫氏焉而
子姓相繼登科文采勿替較之昔賢殆有過之君諱齊
熊初名炳字方虎號耐亭晚歲又自號松阿 誥封奉
直大夫晉贈朝議大夫韡之子 贈奉直大夫晉贈朝
議大夫甲臨之孫 封儒林郎可佳之曾孫君幼有識
鑒弱冠喜從鄉先生游尤爲陶太常晚聞汪贊善杜林

所器重贊善遂以孫女妻焉年十九入縣庠乾隆十二年
中江南鄉試是時兩兄配園叔山皆先入翰林明年
弟閻谷亦館選君三試禮部不見售十九年
御試內閣中書君名入選所賦紅藥當階翻詩傳誦都
下君長身玉立儀觀秀偉而志趣高簡入直之暇研窮
經史鍵戶如儒生所與往還皆一時名宿以文章氣節
相砥礪貴游夸毗子弟或慕與交竟日不交一語也在
綸閣時 朝廷大典禮例得進呈詩冊君所製歌頌博
大淵雅尤得頌揚之體丁外艱旋里尋遇生母時太恭
人憂執喪累年哀戚如禮服闋後以程太恭人年高樂

與昆弟奉侍遂不入都供職趨承晨昏者幾二十年君
昆弟皆治古文而君好之尤專謂文必本于學與行然
後爲有物之言古人立言皆有益於人心風俗否則譎
言長語祇足以長浮華用以阿世則可用以經世則未
也嘗選唐宋以來古文十八家名曰文繫於唐得三家
退之子厚習之於宋取七家永叔明允子瞻子由子固
同甫晦庵於元取一家伯生於明取四家景濂正學伯
安熙甫而以 國朝汪荅文方靈皋陶晚聞三家繼焉
獨惡王安石之文謂其意主爭勝言涉矜夸觀其文知
其人之悖可戒不可法也所著隱几山房稿十六卷禮

潛石室文集 卷四
九
記考義十六卷隱几山房七錄若干卷生平敦孝友以
型家明義利以正俗一言一動必依於法度春秋七十
有七終於里第實嘉慶五年八月十有七日配汪孺人
左春坊左贊善應銓孫女雍正己酉副貢某之女明慧
有婦道前卒子聖珪乾隆戊子舉人女適同邑張培俱
早卒嗣孫廣融乾隆乙卯舉人曾孫淵耀淵獻淵穎銘
曰
邵望出歛乃遷海虞四傳而後枝葉紛敷君與昆季式
大其閭木天薇省棣萼聯趨青紫匪戀循陔孔愉年周
甲子猶奉板輿品以行邃文與道符著書滿家質而不

夸疇昔定交冊載有餘我神久瘁君顏尚腴今春訪我
攜曾孫俱詫其蚤慧可慰桑榆玉棺俄降執紼在途納
銘幽室終古弗渝

顧桐井墓志銘

吳縣顧文學蕤砥行立品爲文不隨逐時好蓋儒而君
子者也其父國學生桐井君旣沒將葬持事狀請予爲
之銘蕤肄業紫陽在弟子行以予言爲信義不可辭也
按狀君諱應昌殿舍字也桐井号也行第五又自号五
癡也先世自金陵遷吳五傳至國本明季貢生祀鄉賢
私謚貞孝先生者君之高祖父也長洲縣學生茲其曾

潛研堂文集 卷四十四
祖父也考授州同漸其大父也國學生階升其考也君性孝友父病延醫百方療治用一劑必辨論至當而後進自是遂精于醫常有奇效處方不用難得藥思以偽亂真也有弟患漏經年君親爲敷藥日四五次雖臭腐弗憚也弟歿遺孤尙幼一日有舍失火舉家驚惶君抱姪置妻懷中曰善視之勿令怖子女雖環泣弗顧也姻黨有以爭嗣訟者縣令偏袒欲以立愛爲名詢諸預議者衆莫能對君正色曰生前或有立愛歿後知誰愛邪令以其言直遂弗能奪也君幼羸弱術者皆謂不壽初就傅母夫人戒勿多讀傷氣其師獨異之曰此子雖多

病然甚孝必能延年勿慮也君生于雍正乙卯卒于嘉慶丙辰行年六十有二也夫人汪氏候選詹事府主簿大經之女亦名族也有子二人長純而繁季也女四人嚴秉芝汪超倫毛塚施光墜其壻也郡城之某鄉某原君所藏也某年月日葬之期也銘曰

維士有志重義輕利君雖不試孝友自厲維蓄之深維守之欽楹書貽後以俟天譴

潛研堂文集卷四十四

門人袁廷檣校字

潛研堂文集卷四十五
十一
潛研堂文集卷四十五
任孝友父病延醫百方療治用一劑必辯論至當而後
也自是遂精于醫常有奇效處方不用雜得藥思以爲
守之幾盡書韻以爲天瑞爲數藥日四五次雖其腐
錄士亦志重辨濟陳昏輒不爲幸文自飄緜蓄之幾錄
昏泯蘇出某平日日養之陳出論曰雖環泣弗顧也烟
艱秉芝官跌創手解欲光望其澤出縣紙之某濼某京
大益之文衣谷熟出許于二人尋蘇而藥季出文四人
慶丙是許年六十許二出夫人王丸劑與習專內主計
深然甚幸必許取羊心獻出昏生年蘇山了眼卒年壽

潛研堂文集卷四十五

嘉定錢大昕

墓誌銘四

封通議大夫日講起居注官文淵閣直閣事翰林

院侍讀學士加三級陸公墓誌銘

文淵閣直閣事大理寺卿陸公錫熊以博洽通儒承

天子知遇由郎官入詞垣領袖四庫書局洵登學士

遂列九卿逢國大慶推恩三世尊人通議公方就

養京邸踰七望八神明不衰大理嘗被召預重華宮

聯句賜御題楊基淞南小隱畫卷公以里居在

淞江南因自號淞南老人以識 君恩閱數載大理
復蒙 上賜 御題老年詩卷公賦詩恭紀有
淞南小隱成佳話更喜 新題老年之句朝野莫不
榮之公性耽山水不耐拘束在都下未久輒策蹇南歸
所居日涉園本明陳太僕所蘊別業清曠饒水石之趣
公更治數椽顏曰傳經書屋日焚香宴坐其中春秋佳
日招一二親串賦詩談讌不異少壯時乾隆四十八年
十二月四日無疾而逝春秋七十有八大理奉諱奔喪
哀戚盡禮卜吉於次年十二月丁酉葬公上海縣西南
二十七保鳳皇橋之新阡以張曹兩淑人祔焉禮也先

期踵門乞火所爲文 其墓大昕與大理托道義交廿
餘年於公修猶子之敬其敢以不文辭謹按公諱秉笏
字長卿一字葵霑世爲華亭望族元末有承事郎子順
者始析居上海之馬橋五傳至文裕公以文章翰墨知
名海內文裕之從曾孫曰起鳳明天啟辛酉副榜 皇
朝贈中議大夫布政司參議卽公會大父也大父鳴球
廩監生累贈中議大夫翰林院侍讀學士加三級父瀛
齡雍正癸卯拔貢生石埭縣儒學教諭累贈通議大夫
翰林院侍讀學士加三級陸氏文獻舊門石埭公學衍
尤高公幼承庭訓年七八歲已知作文嘗製詩賦雜體

文各數篇裝小冊置懷袖中署曰陸某稿親舊見者以爲非常兒弱冠補縣學生辛酉歲援例入成均中式順天鄉試公所作制義高古有法度聲名籍甚七上春官不遇然未肯稍降其格最後應丙戌會試時大理方直樞廷先已典試山西公猶低頭聽唱名引試揮灑千言不見老人衰憊之氣平生雖澹於榮利而文字結習志不少衰如此公博涉經史不名一家尤惡俗學專已守殘之陋故大理丞公緒論益自殖學以大其門公事親以禮與人交有信貴而能謙持躬治家皆可爲世法以大理貴公誥封奉政大夫刑部直隸司員外郎加一

級進封中議大夫翰林院侍讀學士加二級再晉通議大夫翰林院侍讀學士加三級初娶張淑人縣學生大本之女卒於雍正十年八月三日春秋二十有五繼娶曹淑人工科給事中諱一士之女工吟咏與公拈題唱酬無虛日有晚晴樓詩稿行世卒於乾隆八年八月廿日春秋三十有五再娶曹淑人卽給事季女三淑人皆有禮法鄉鄰稱女宗子一人卽大理也女五人壻曰凌松心王時夏張坤孫朱文炯趙熾孫男五人慶循慶堯慶庚慶勳慶均孫女二曾孫女二銘曰公公生名門績學有聲誦芬詠烈若士衡兮克敦孝行孳

精經旨模楷人倫若公紀兮江湖泊宅文史跌宕手定
叢書若魯望兮內助之懿離穆有禮比肩唱酬若東美
兮公有賢子領大著作并判廷尉若伯玉兮鶴髮未皤
鸞語疊封壽考康寧若放翁兮鳳皇之橋佳城若防者
舊名德久而不忘季寧有墓近在雲間誰其踵之夫子
之阡兮

贈儒林郎翰林院編修加一級晉贈奉政大夫刑
部河南司主事加二級馮君墓誌銘

古聖之言孝也曰揚名於後世以顯父母夫揚名者一
己之事而其父母之賢亦因有賢子而益顯此孝所以

居六行之首也若夫由父而推之以及其祖則禮傳所
謂大夫以上則知尊祖者而世遂以後有達人知其積
善之有自昔東坡為大父廷評行狀稱其制行甚高後
世信之無異詞藉非有賢子孫則廷評之行或未必大
顯於後先聖垂教豈欺我哉刑部河南司主事前翰林
院編修欽州馮敏昌今之有道而文者也今春奉父諱
奔喪南旋道出吳門素衣冠踵子門告曰吾父之塋學
士大興翁公已為之銘唯先大父潛德未曜茲以某列
官於

朝馳贈五品將勒石墓道以漸不朽謹撰次行狀請吾

子一言表之案狀君諱經邦字憲萬姓馮氏世籍廣東廉州府之欽州

國初大兵平嶺嶠而海氛尚未靖君之曾大父仁溥大父日明避寇轉徙父子相失祖妣彭指据奉姑拾木實自茹而以糗糈進姑鄉里稱曰孝婦大父負遺骸問道歷叢山中未至家過一嶺假寐道旁夢神告之曰此地可葬遂權厝焉負土成墳人以爲孝感父應祥以勤儉起家爲太學生時州中有所謂大役者凡州官公私支應皆責里長取辦大約如宋之衙前當是役無不破家者太學慨然率同志訴諸大吏其弊遂革而家因以落

君工於制藝爲博士弟子與兩弟相切磋文日益有名及兩親沒後絕意進取或勸之輒泣然曰求祿以養親也親歿矣何役役爲乃卜築於州西九十里天馬山之南雅邨顏其室曰半畝居闌成趣軒環植花竹屋後倚山高松數十株深林掩映不見赤日暇則招二三知己吟詠風月盡醉乃已有陶靖節王無功之風春秋五十有九無疾而逝夫人李氏生子達文由歲貢生候補訓導歷署開建臨高花縣教諭事側室黃生達忠達元孫十人曾孫十三人刑部在諸孫中最長且賢髫齡時君尤鍾愛親自課讀擇古人嘉言懿行可師法者俾誦習

之以故刑部學有原本年十二而游庠弱冠而名滿海
內刑部工古文詞讀其狀質直有先民規矩援坡公之
例自足以壽世而猶假手於予刑部之謙也抑以予不
善諛墓中人言之而人或見信故轉有取於老鈍之筆
邪然則刑部尊祖之意尤可感矣

贈奉政大夫黃松石先生墓誌銘

予少時卽聞錢唐黃松石先生名又見所作篆隸淳厚
有古法益欣慕之晚乃得交其子小松郡丞始知淵源
所自今夏小松奉梁太宜人之諱扶輿將歸里先遣其
兒子元鼎踵門來告曰先君及陳太宜人以乾隆廿二

年塋本縣上泥橋之阡某方僮穉誌石未備今吾母不
幸棄養謹卜日啟先兆而合塋焉敢匄文納諸穿中子
受其事狀讀之喟然曰此孝義獨行傳人物也按狀先
生諱樹穀松石其字晚歲游孔林得楷木之瘿攜歸名
其齋亦以自號世居杭州之錢唐六世祖汝亨明江西
提學參議學者稱寓林先生大父佑銓縣學生父兆泰
贈徵仕郎先生性敏慧童時賦綠牡丹詩卽爲士林
傳誦家貧隨北游侍起居惟謹比壯以筆耕自給奔波
南北爲甘旨之計父歿於保定旅邸先生自里門衰絰
沂江渡河至棗林遇大水泛溢行旅斷絕跣足行泥淖

中沙石所觸血常濡蹠至河間覓舟不可得附蟹舟行
遭大風幾覆溺者再始達保定訪瘞棺所在水嚙露前
和起之已朽乃號泣函骨以歸買兩買三尺竹自扶跣
行七晝夜抵德州始得附舟南返繪涉水負骸圖以志
痛王虛舟吏部題其卷比於古之虞趙焉參議公寓林
講堂久圯卽其地葺爲廣仁義學聚書數萬卷以資學
者先世手澤散落遇片紙隻字必質衣購之少耽經史
於六書尤有神悟篆隸用筆渾古婁縣張文敏公推爲
第一手詩文詞翰名重公卿有欲以經明行修薦者辭
不應其於友誼尤篤以緩急告者傾囊無吝色視其家

無擔石儲也母喪過時猶哭竟以得病春秋五十有一
以乾隆十六年九月廿七日卒以子貴累 贈奉政大
夫所著有格物考河防私議百衲琴清華錄楷瘦齋集
初娶陳宜人諱蘇字若蘭國學生某之女幼事母以孝
聞合巹之夕雙燭忽燼其一心知不祥未及四月而卒
年一十有八時康熙五十九年四月二日也繼娶梁氏
諱瑛字梅君處士師燧之女賢而有文事兩世姑能得
其歡課諸子萬卷樓中一燈熒熒輒至達旦好吟詠而
集句詩尤工曾刻入大雅集先生之捐館也宜人手撰
行狀數千言委曲真摯門生故友見者咸閣筆晚歲就

養山左官舍年逾八秩神明不衰曩時所誦習者默記不失一字仁恕好施予冬月常製衣以待凍者恭遇覃恩誥封太宜人嘗語郡丞曰吾家自少參公後筮仕者唯汝一人此汝父積善所致慎無忘清白家風也乾隆六十年閏二月五日卒年八十有九長子庭國學生坐累謫塞外卒次經早卒次易今官兗州府運河同知卽小松也次童國學生孫男三人元鼎元長元禮孫女五人銘曰

蓼莪之思兮銜恤靡至萬里負骸兮瀕險而濟匪文繡而富兮匪軒冕而榮端孝之謚兮孚於鄉評有子亢宗兮唯慈訓是謹畫荻諄諄兮曰惟崇公之訓贈秩五品兮賁重泉胖合良兮吉且安千秋萬歲兮比於瀧岡之阡

何桐蓀墓誌銘

錢唐何元錫夢華與余交十年矣今冬卜葬其尊人明經君於西湖普福嶺之陽啟元配陸孺人之窆而合祔焉先期至吳踵門屬銘其藏夢華篤志古學尤嗜金石刻當援瀧岡西山阡表之例自爲之文而偏有取於衰鈍之詞豈以予性朴直不苟諛人文雖未工詞或可信乎按狀君諱紀堂字山甫一字桐蓀先世自上虞遷於

杭曾祖喬雲康熙丙辰進士嘗作令湖南勅議免四十
二州縣無名稅失大吏意然楚人至今尸祝之秩滿行
取當授主事卽請告歸以著書終其身祖玉梁雍正癸
卯進士翰林院編修文章爲一時宗仰世所稱樟亭先
生也父熊雍正乙卯鄉薦知廣西之宜山湖南之祁陽
二縣皆有治聲君少而明悟爲大父鍾愛長從吳雲巖
修撰學爲詩文才思清贍學使長洲彭公啟豐取入郡
庠援例貢成均應南北鄉試屢薦輒不售內行淳摯孝
事祖母及二親禮無違者及父官粵西祖母以道遠不
欲就養君在家侍奉溫清晨夕甘旨無闕何氏宗枝蕃

衍多貧不能葬者計七十餘匱君聞而惻然請於父擇
地序昭穆塋之性愜慨勇於赴人之急而不責其償其
客山左也有馬別駕登鰲者假貸數千金卽傾囊子之
無幾何別駕歿遺孤貧不能自存君卽焚其券雖以此
致困終不悔也君精於醫術候三部脉處方劑應手輒
愈愈後亦弗求報春秋六十以乾隆五十九年六月二
十八日卒有詩稿二卷道樞書屋隨筆十卷又有續涪
溪志四卷則侍親祁陽所葺也娶陸孺人淑懿有賢德
以乾隆三十九年五月十八日卒春秋四十陸孺人生
四子元銓府學生元錫元鼎皆候選縣主簿元昌國學

生蚤卒側室王氏生元鉅元符皆幼孫一人瀛銘曰
緩之若若沒則已焉抱璞在躬久而道尊南陽伯求廬
江子季第五之名何減蹀躞淵哉若人詩禮舊門文不
偶俗德以潤身族屬雖分皆吾一脉掩七十棺歸於窆
交良友告匱傾貲貸之友死子弱折券置之李錄厚德
歐表一行以今況古方策同炳澄湖汪汪宰木蒼蒼有
子而賢積善其昌

布衣臧君墓誌銘

臧氏望出東莞其後遷浙之長興又自長興遷江南之
武進 國朝有諱琳者以名諸生精研經術著書滿家

學者稱玉林先生是爲君之曾大父生子晉晉生若彩
若彩子卽君也君諱繼宏字世景晚自號厚庵少有至
性年十三失母號慟如成人每晨夕伏柩側屏息諦聽
曰吾母其復生乎旁人嗤其癡弗爲止旣長以家業日
落奔走服賈然造次必依於忠信嘗爲某氏持錢同事
瞰其家孤寡可欺欲以計吞之君度力不能禁慨然曰
受人之託坐視其敗而不言是與同惡也卽攜襆被辭
去中歲節縮衣食稍稍自給營葬考妣及先世五殯同
時安窆誠信有加三黨之無倚者分所有贍之平生好
扶助人事變倉猝傾囊相濟不計其人之償否亦不責

海石堂文集卷四十五
十一
異日報也嘗訪友長沙渡江兩舟並行遇暴風一舟先覆同舟者惶怖無人色君慰之曰死生有命雖恐思無益靜以待之可耳其教子極嚴有過扑責不少恕延端士爲之師課以舉子業晚歲謂子鏞堂曰文章當從經典來汝等能續我祖玉林公之傳吾願足矣又言吾身後勿作佛事天堂地獄當於生前善惡決之禮懺作樂徒爲比邱輩作快樂場耳嘉慶元年七月九日以疾終於家春秋六十有九娶章氏子鏞堂常州府學生次鏞堂禮堂吧堂孫一人始餘姚盧學士召弓數與子言鏞堂之賢因與定交及君之塋鏞堂述事狀乞銘故不得

辭銘曰

玉林遺書伏而未出什襲至君手澤無失君有賢子校而錄之士林快覩尊爲經師惟子之賢由君之教不言躬行孝乎惟孝豐西之鄉四尺其封善必有後允哉是翁

嚴半庵墓誌銘

子與歸安嚴文學元照交有年矣子假館吳門相去僅兩日程聞其家多藏書而尊人善教子乘輿欲往訪之輒以事阻不果今冬元照墨纒至子館舍稽顙而言曰吾父以今年六月十三日弃養行且卜塋思所以不朽

吾親者惟先生之女是賴子辭不獲已乃卽其行狀稍
詮次之按吳興嚴氏本貫平江之嘉定明洪武初有達
卿者避亂至歸安之石冢村始占籍焉有子曰毅毅生
敬官監察御史河間長蘆運鹽使敬生齡齡生宇宇生
茹茹生贈奉直大夫刑部員外郎而泰而泰生縣學生
正思正思生府學生欽欽無子以弟之子縣學生爾琪
爲後卽君曾大父也大父躬逢德清縣學廩生父秉謙
府學廩貢生候選儒學訓導母嵇孺人生子四君最幼
弱齡有至性甫九歲聞兄殤號慟不食者三日族黨咸
異之讀書警悟初習制義下筆頃刻千言成童後患瘵

積久之不愈父母恐其苦思致疾乃納粟爲國子監生
父嘗命主出納管鑰數年纖毫無所私父喜別賜之干
金及父病瘵經歲君出所賜金買人葠和藥以進未嘗
私一錢也性忼慨喜周人之急雖解衣稱貸不少惜爲
人排難解紛必盡力有負之者亦弗與校中年以後困
于外侮所向恒不如意又艱于得子年四十始得子元
照甚慧三四歲卽能作擘窠書君喜甚思所以教子者
則曰浮而不實非學也於是聚書數萬卷遇宋元槧本
不惜重價購之元照旣長延名師督課舉業之外兼及
羣籍旣入膠庠有名矣則又曰博而不精非學也士以

通經爲本窮經必通訓詁而文字聲音則又訓詁之所由出舍古訓而以意說經大道之多岐必始此矣元照遵其訓於是有娛親雅言之作每辨論古義必進質於君而後筆之遇有排擊先儒過當者則又誡之曰辨而爭勝非學也議論深刻非徒招忌亦恐損福不願汝曹效之也元照以高才生試行省屢躓人或以爲病君則曰窮達自有命耳古人以少年登科爲不幸姑盡其在我可矣噫今世教子弟者汲汲於利祿讀世俗浮濫之文數百首便可弋獲視通經學古之儒指爲迂濶何怪乎士風之日薄乎子故舉君之教子以爲法君諱樹蓼

字茂先一字半庵年六十有七以嘉慶五年六月十三日卒元配許氏次陳氏次亦陳氏次莊氏俱無子筵室范生一子卽元照歸安縣學生孫男二人培均女二人銘曰懸黎在握世所寶兮不如有子之率教兮袍笏盈床衆所好兮不若鉛槧之可樂兮鞠子之勞兮未食子之報兮維令名之劭兮庶以榮厥考兮

郭肯構墓誌銘

三晉以孝友世其家者曰平遙郭氏五世同居門無異財縣學生樸村肯構兩翁寔董其家政每督學使者至輒旌其門以示勸士大夫無不翕然稱之今春肯構翁

卽世將卜葬于城東十里之長寧原其從子興讓狀其
行事乞余銘興讓與余同年進士卽樸村翁之子也讀
其狀質而無溢美故樂得而書君諱大址肯構其字始
祖思忠自陝西渭南縣徙平遙之王郭村其十世孫曰
三耀三耀生縣學生紹儀紹儀生三子長爾強是爲樸
村之考季爾翰寔生君故君子樸村爲從父昆弟君少
樸村一歲總角時食同器臥同榻入塾同硯席旣冠同
籍學宮自壯至老晨夕相依其友愛雖同產不是過也
君狀貌嚴重鬚長尺餘事親孝交友信視端行直非禮
不動家世同爨食指繁多而樸村翁性曠澹事無大小

悉委之君每辨色卽起諸子姓上堂問起居惟謹婚嫁
喪祭必裁以禮平居服用皆取儉朴惟課子弟讀書必
延名師一門羣從學業皆有師法平遙三百年來以進
士起家者自興讓始君之教也興讓之孫于君已親盡
君撫視之如已出有過失輒加箠楚君旣不以屬踈引
嫌家人亦帖然無少嫌也姑之子某負官錢二百緡吏
逮治之急旦夕且瘐死君資白金詣縣庭代輸之事得
釋諸姑之孫以貧告者君出貲數百金俾各作生計折
閱殆盡無愠色或諷君不善殖財則曰吾家藉先世遺
產頗饒足彼雖遠戚自吾祖視之皆外孫曾也吾敢私

先人所有哉君生于康熙三十二年六月十三日卒于
乾隆二十九年三月十六日春秋七十有二配高氏子
男一人于京國學生女三人適國學生梁理介休縣學
生范韜光國學生張應璠孫男三人豐型豐烈豐孚銘
曰
子壯出分俗自秦別籍異財始弟昆戚單服盡行路均
不念厥初同一身范道根李聖伯五世同居表史冊誰
其繼之平遙郭千秋萬載跡貞石

孝廉蔣君墓誌銘

乾隆庚子秋餘姚邵二雲侍讀典試粵西得人最盛全
州蔣君德載其一也子嘗訪粵士文行兼脩者於二雲
二雲輒舉君名予故耳熟焉而未之相識也今冬君之
兄郡司馬雲亭來告君之訃且狀其行乞予銘讀之泣
然知二雲之言不我欺也君諱勵容德載其字世居全
州萬鄉龍水村州中言望族者必首蔣氏父振葵直隸
慶雲縣知縣有子六人君次在五少靜默寡言笑而善
承親意慶雲公嘗指以語宗人曰是兒孝我處伯仲間
怡怡愉愉自幼至壯如一日讀書潛玩義理遇有疑滯
反覆思之恒達旦不寐久之亦諫然以解尤愛宋儒書
博觀約取務在切近易行爲文直抒所見不喜爲帖括

揣摩之陋諸兄強之應試補博士弟子年三十六舉於鄉公車屢上輒躋吏部注選知縣需次南還平生無聲色靡曼之好無機械狙詐之習重義輕利篤舊慎交徜徉山水間泊如也與司馬幼同學勸善規過相敬如執友司馬攝青浦令時君往視之適歲暮徵漕粟君入庾鈎稽簿籍閱視斗斛雖滑吏莫敢上下其手君娶曹氏無子年五十有一以乙卯正月十八日終於里第遺言以司馬第三子啟錦爲後卽以其年某月日葬二雲爲子乙酉典試所得士君出其門與予有通家之誼不敢以不文辭銘曰

惟漢舉士興孝察廉家修無玷束帛乃占近代鄉貢登於禮部名曰孝廉實則未副恂恂蔣君佩實銜華內行淳篤潔白無瑕軒冕匪榮名教自樂沒而名稱豈爭且莫金盆之原佳城鬱然過者必式曰惟真孝廉之阡

嵇靜園墓誌銘

君諱文揆字大醇一字靜園無錫人文華殿大學士贈少保文敏公之曾孫文淵閣大學士贈太子太師文恭公之孫翰林院侍讀晴軒公之嗣子自文恭公以上勲德具載國史君天資雋爽好豪飲視阿堵物若無所覩隨手散去亦不甚惜中歲遊川運例入貲當得

府經歷掣籤試用江西嘗委署南昌吳城同知饒州景德同知廣信弋陽縣丞終未得實缺君嘗自言吾官當至四品壽至八十卽與君厚者亦謂君之門地才氣必能副斯言也乃奔走簿領十餘年訖無所遇鬱鬱不自聊年四十七卒於弋陽官舍娶同邑鄒氏子一人國子監生峻女二人長適歸安縣學生嚴元照次許字程孫男一人女二人憶子初入詞館文恭公方位少宰以後進禮通謁卽荷獎借以詩古文相期許每有經進文字輒招與討論可否其後十餘年子與晴軒同侍直上書房寅入酉出寒暑無閒課誦之暇相與縷述家事不

異昆弟旣而各有視學之命子往嶺南晴軒往關西宦迹邈隔音問遂踈子奉諱歸里遂不復出晴軒任滿還朝未幾捐館傷其無子聞以弟兵部長子爲後亦未得謀面也乾隆庚戌子以祝嘏抵都門文恭公時爲首揆親訪子寓邸談諧如平時以子之鈍劣踈嬾尚在元老記憶之中古道良可感已及文恭公薨子適以病瘥未與執紼私心恒以爲歉今又聞君之訃孤子峻踵門求銘俛仰交情轉瞬四世老成人逝蘭蕙俄摧而子亦顛然將老昔人云旣痛逝者行自念也悲夫銘曰相門世嫡而官以八品止簪力方剛而算不盈四紀生

潛研堂文集卷四十六
未相識歿銘其藏述德感奮以誌不忘

潛研堂文集卷四十六

墓誌銘五

國子監學正戴先生墓誌銘

乾隆四十有八年三月十四日國子監學正上元戴先生卒春秋五十有九嗚呼先生今之經師也往歲壬午與族人東原同舉于鄉一時有二戴之目子與東原交最久東原歿後始得交先生而意氣相投猶東原也先生之子衍善衍範又嘗從子遊乞予志墓其何敢辭先生諱祖啓字敬咸別字東田後更以未堂自號先世居



徽之休寧明萬歷中有諱顯傑者始自江西徙江寧曾祖進忠贈文林郎祖天章上元縣生員贈朝議大夫父濬增廣生先生少穎悟世父學士雪村公教以書史記誦之餘卽能講解弱冠以後遂潛心經義有志于儒者體用之學於四子書用功尤深凡精義語類及大全之說皆博觀而審擇之所作舉業文精深博大一以先民爲師吳門楊文叔高郵夏醴谷兩先生先後主鍾山書院皆嘆以爲異才然浮沈諸生中者十有五年舉鄉薦累試禮部輒不遇而學益高望益重甲午歲陝西巡撫畢公墓其名延爲關中書院院長比攷課甄別升降之

規皆取決于先生日有程月有課視生徒如子弟隨材善誘各有進益嘗曰我無它愛憎惟真讀書立品者文或未工亦優獎之大要欲合文章學問人品爲一也居數月弟子著錄日衆安西迪化諸州來學者趾相接畢公乃奏于 朝言戴某學術純正訓迪有方六年後如有成效乞格外推恩酌用得 旨報可戊戌試禮部成進士例授中書科舍人仍還關中明年先生在院六載矣畢公援前奏復薦諸 朝引 見之日特試四書文一篇有 旨以國子監學正學錄用旣拜命需次歸里未到選期奄忽不起嗚呼書院始于宋初

本鄉學也

世宗皇帝始頒詔立書院于行省治所合一省之秀者
延名師教之擬於古諸侯之國學先生主講席有年道
尊而教行牧伯咸薦天子親試將以爲太學之師視
胡翼之之遇殆過之矣海內方以爲眞先生復出而竟
止于此悲夫悲夫平生篤志經籍議論一以宋儒爲宗
所著尚書協異尚書涉傳春秋四測老子新解各若干
卷文集又若干卷性不妄取而常濟人之乏嘗舉大父
語以勸子弟云利于人亦利于己者亟爲之利于人不
利于己者勉爲之利于己不利于人者勿爲也娶黃孺

人辛酉舉人元鑑之女子四人衍善上元學附生衍範
國子生衍緒衍士女子三人壻曰丁酉副貢生王芾曰
己亥科舉人方遵軾曰試用州同阮坦孫男二人孫女
二人銘曰

俗學之弊急於功利口誦程朱而行與悖卓哉先生文
與行兼規矩允蹈泥淖弗謙研思六經旁及子史不苟
異同要衷於是收伯禮請爲諸生師夫子之稱徧于闕
西教成入覲天顏有喜俾官成均分教胄子濟濟
槐市企踵云來胡不旄期梁木遽摧先生逝矣典刑猶
在學成一鄉名動四海九江信都歿而道尊遺書無恙

昌爾子孫

優貢生候選儒學訓導楊君墓誌銘

國家立學校崇儒術選京朝官提督學政三年一更代將受代例擇通省人士文行兼優者三四人或二三人升之成均以示勸也夫鄉試三載一舉大省解額或多至百餘人然徒錄其文未及其行惟學使薦舉優行擇之精故得之尤難幸而得之又或名與實不相應以予所見名實允副者其惟吾友楊君鐵齋乎蓋自平湖陸清獻公講學東南恪守攷亭不爲它說所搖動論者推爲本朝儒宗第一君私淑清獻尊而信之又嘗從陸

聚緜編修遊與上下其議論故博涉羣書得其要領編修之歿君爲文祭之謂朱子後大儒無如南吳北許兩公魯齋墨守寒泉遺論草廬作諸經纂言則別有心得有魯齋以干城朱子然後異說不得逞有草廬以推廣朱子之學然後儒家不局於專門訓詁之陋蓋以清獻方魯齋而以草廬擬編修也而君生平學行宗仰所在斷可識矣君生而穎敏五歲授以漢魏六朝詩卽能背誦時族兄進士錫恒豪於飲一日宗人小飲指謂君曰弟試誦詩一首吾當飲一杯君卽應聲誦數十篇無一字誤進士連引釀遂至沈醉舉坐驚異及長補金山縣

生員文日益有名十應鄉舉同考薦卷者四終不遇學
使晉寧李公因培舉君優行明年

聖駕南巡召試詩賦入二等有內府文綺之

賜聲名隱然動江左而不得一官命也君之舉優行也
與吾邑曹中允仁虎同薦李公有春華秋實之目中允
旋登進士列侍從君獨躋蹙塲屋以升貢太學當得儒
學訓導未及官而遽沒然公論具在固不以顯晦分優
絀也君事親孝居喪自大小斂至祥禫壹遵家禮儀節
嘗與友人論喪禮謂記云居喪未葬讀喪禮既葬讀祭
禮此爲平日未讀禮者言也儀禮十七篇素所誦習何

待苦由中始佑畢哉張子言居喪它書不可觀者謂非
聖之書也讀聖賢書未必越于禮外聖賢之學寧以居
喪而遂忘之其議論通達如此教授生徒各隨才器誘
掖之所成就者尤衆性耽著述丹黃不去手於四書詩
書易小學皆有劄記於春秋有四傳存疑于三禮有臆
說又有觀理編律呂指掌圖鐵齋偶筆詩文雜著合若
千卷君初名開基字履德其後更名履基而仍其字鐵
齋其自號也會祖國訓贈奉政大夫祖黼一名貫甫
江西臨江府同知父升歲貢生候選儒學教諭先世居
平湖後徙婁縣之張堰雍正初析婁之南境爲金山縣

今爲金山人夫人陸氏都察院左僉都御史某之孫平
湖縣學生某之女早卒君壯失偶終身不更娶子運昌
縣學生女嫁婁縣學生馮孝錫孫男一人女一人君春
秋六十有三以乾隆四十年閏月十九日終於家以其
年某月日塋於某鄉某原銘曰
鑿之深而成淵也綆之修而及泉也玉粲之瓊兮上燭
天也終韞于櫝璞自完也讀父之書有子賢也謂客莫
嘲後有子雲也

孝廉胡君墓誌銘

嶺以南才士予所識者三人欽州馮敏昌魚山順德張
錦芳葯房及胡亦常同謙同謙以詩經舉於鄉出吾友
益都李南欄之門其來京師介南欄書訪予與之言詩
文源流洞中癡結它日讀其所作詩超然獨遠脫棄凡
近之格旣下第南歸與休寧戴東原同舟至富春江乃
別舟中盡鈔東原所著書攜歸將刊之東粵抵家後手
書報子欲壹其志於經術子益聳然異之無幾何葯房
以書報同謙死矣且述其事狀乞予爲銘已而南欄書
至復以爲言乃摭其畧書之同謙姓胡氏亦常其名贈
文林郎翰林院庶吉士景輝之曾孫贈承德郎吏部主
事炳之孫丙辰進士翰林院庶吉士吏部驗封司員外

海濱集卷四十一
六
郎傑之子性冲淡淵默與鄉人處由由然不見臧否而
抗志希古不欲爲一鄉一國之士方吏部捐館時同謙
年尙少能自刻厲以殖其學事母何太安人孝有郭外
田數十稜最其歲入悉以奉母晨夕甘旨無缺夫婦終
歲厭粗糲自若嘗購書盈篋索直數鎰謀諸婦脫釵質
錢償之不敢私取田之所入其於詩妙悟天成不由師
授能於南園諸公外自成一家魚山嘗謂人曰吾粵詩
人曲江之後當推海雪繼海雪者其豸浦乎豸浦同謙
所居因以自號者也同謙生於乾隆癸亥某月日以癸
未三月廿四日卒年止卅有一其卒也以歸舟盛暑中

鈔書多咬瓜果解渴得胃寒疾歸而益劇竟至不起死
之日有四女而無男後數月妾遺腹舉一子名應科又
明年五月母何太安人卒應科亦殤嗚呼同謙之目其
不得暝矣夫悲夫悲夫銘曰

榕之不材其大蔽牛蘭之猗猗秋風敗之豸浦之原四
尺墳兮恒幹久棄神明存兮

孝廉范君墓誌銘

予歸田後慕四明天台之勝數往來甬上與其鄉賢士
大夫游所尤心折者孝廉范君莪亭也君性樂夷澹外
和內介以圖籍爲生活以友朋爲性命予嘗偕一二同

志訪君甕天居出所藏明賢墨迹品題其高下茗椀爐
香相對竟日不知世閒有徵逐遊戲事君又熟於鄉邦
文獻子纂鄞志數就君咨訪傾困出之無倦色古所謂
直諫多聞之友君殆兼有之比年久不相見而尺素歲
率一再至今春吾家竹初先生書來達君之訃而孤子
懋賢等復狀君行實乞予志其銘爰次而敘之四明范
氏出宋尚書右僕射忠肅公之裔忠肅子員外郎公麟
始家於鄞迄今六百餘年代有顯人爲鄞甲族君諱永
祺字鳳頤別字莪亭康熙甲辰進士湖北通城縣知縣
內閣中書某之曾孫府學廩膳生某之孫國學生某之

子幼而敏悟未弱冠補博士弟子屢應省試輒斥而文
益有名以食餼久次列歲貢年六十始中式浙江鄉試
主司以得名宿相慶而君引疾不赴計偕遂以孝廉終
君博覽強記好收藏明代及國朝名公尺牘自碩輔
名儒忠臣孝子文人逸士以及閩閩方外靡不收錄攷
其時代爵里行誼別爲序錄以寓論世尚友之旨其仕
宦顯達而爲清議所斥者翰墨雖工弃勿錄也工於漢
唐篆隸尤精摹印遠近得者咸什襲珍之甕天室成集
蘭亭字爲七言律二篇東南名士屬和者數十家一時
傳爲佳話其內行修謹言動必依規矩宗族鄉鄰推重

無間言春秋六十有九以乾隆六十年十二月廿日卒
娶朱孺人再娶黃孺人皆先卒子四人懋賢懋穎懋楫
懋樹伯季補縣學生餘皆太學生女一人壻曰水濬孫
十六人曾孫一人銘曰
學之博也蔚乎薦紳之型行之敦也叶乎州里之評猗
大器之晚成而澹乎其居貞雲養弗升水冽弗盈以昌
其名

張蔚園墓誌銘

君姓張氏諱大受字若谷一字可之蔚園其自號也先
世自無錫遷居常熟曾祖雯昌明中書舍人祖廷華鄉

飲賓父文揚倜儻好義交游皆賢士大夫陶編修貞一
嘗爲作家傳稱九如處士者也君所居卽瞿文懿公故
第始生之夕處士夢文懿授以筆曰以異爾子六歲就
傅穎悟絕倫十二卽能詩十三丁母陳孺人憂日跪木
主前誦金剛經三年無間五經博士言先生德堅教授
里中君與陶太常正靖嚴觀察有禧俱稱入室弟子益
都趙贊善執信來吳中君以詩文請質許爲國士并賦
詩書箴贈之十九補太倉州學生明年試高等食餼於
庠與沈編修淑約入山讀書學成乃出未幾丁處士君
憂沈亦聯登鄉會榜不果斯約以貢入成均與番禺莊

相公有恭同邑孫主事夢達襍被蕭寺以道義相期勉
未嘗持一刺走貴人門也鄉先達蔣文恪公欲延爲師
乘小車往訪屏跡不見累試京兆無所遇復歸里門從
學者日益衆乾隆十六年
天子首舉南巡之典君獻頌行在文采博瞻以籍
貫誤注不得預召試之列自是無仕進之志而造詣
益醇鄉邦有大利病輒倡議究其可否先是大吏建議
築兩縣沿海石塘君言築隄捍湖本以衛民今所定塘
基乃在濱海三五里以內綿亘百廿餘里所占皆膏腴
之產徙人廬舍毀人墳墓不知凡幾且築塘之士必取

諸近地計塘身及起土之所占田殆將萬畝國家會
計久定雖灘沙懸課往往以漲補灘未得遽議豁免此
所占田旣無漲可補勢必加派於通邑百姓未得護田
之益先有加賦之累矣因貽書蔣文恪公纒纒千餘言
指陳尤切其見義敢言通曉治體如此惜乎未得尺寸
之柄而以明經終老也以乾隆三十四年八月十日卒
春秋七十有一配黃氏國子監生朝珍女未嫁時剖胷
肉愈母疾汪孝廉元亮爲之傳子二人曰應麟曰應祥
戊子舉人孫夔有學行能世其家君所撰述甚富中年
燬於火今遺文四卷夔所搜輯也其葬在錦峯山麓耐

處士穴之左銘曰
士不榮世宜昌其文文無難易有本則傳剽賊偏駁外
強中乾剪絲之花雖多弗鮮猗歟蔚園本本原原楹書
零落拾遺抱殘志存開濟非苟而言鄉人尸祝久而勿
諛匪直也文其行允敦我撫其實式表墓門

潛研堂文集卷四十六 門人吳嘉泰校字

潛研堂文集卷四十七

嘉定錢大昕

墓誌銘六

廣東雷州府知府馮公墓誌銘

嗚呼此故中憲大夫廣東雷州府知府前整飭洮岷兵
備道甘肅按察副使代州馮公之墓始公由戶部郎舉
堪任道府引

見得陝西甘州府知府陞辭請訓

世宗憲皇帝大賞異之

特賜御書及貂皮湖筆紫金錠諸物越四年以公事吏

議當降調總督劉文恪公等奏請畱公疏入

上曰馮某老成諳練係朕記名幹員不特應畱府任卽道員亦可用之卽照所請行劉公奉

詔驚歎曰

上真知人

今上御極之十六年

車駕幸江南公時爲蘇州同知執事

行在一日宮門出片紙書公與學鹽同知李某名傳問總督黃文襄公曰兩同知居官孰優文襄以公名對因有雷州府之命蓋

聖人在上酌民言而飭吏治一收唐宋明重內輕外之陋雖萬里之遠若在堂闈治行善否無異燭照數計而如公者亦可謂能舉其職者也公幼能文年十七遊京師貫順天籍爲諸生已而改歸本籍中雍正元年

恩科鄉試明年成進士又二年補戶部江南司主事遷

河南司員外郎奉

命典陝西己酉科鄉試得人稱盛其任甘州也西陲方用兵羽書旁午公星夜馳之官經理糧運無乏軍器手自料檢皆中程式嘗被檄攝甘肅州安西三道所治道里去府回遠公來往其間百事皆舉一時縮四印未

嘗稍形竭蹶也乾隆三年遷平慶道按察司副使次年
調洮岷道洮岷番彝雜居轄土司二十四屯田茶馬任
劇事繁公以誠信待物在官三載不名一錢及以事望
吏議得

旨送部引

見將行土官屯軍追送多泣下者以父憂歸里復丁太
夫人喪墓祭如禮服闋吏部引
見卽命往河南補陳州府知府陳地窪下多水患公甫
至值淫雨卽周歷屬城相視隄防至西華之青龍隄水
大至隄且潰衆洶懼勸公避之公曰官去民將安恃下

令敢有走避者罪之親率人夫守護隄賴以完府城故
有絃歌書院七邑生徒肄業其中公爲延名師課之暇
日則親往校其文藝之優劣而獎厲之諸生之秀俊者
咸聞風而至由是文風甲于中州以失察屬吏被劾左
遷江南蘇州府督糧同知吳中估客所集督糧主徵比
逋欠前政或持兩端爲利案日以積公至敕吏胥取累
年故案立爲決之無敢于以私者其治雷州也海濱蠻
獠多不帥教公能以誠信化之遂溪民韋甲爲仇家所
誣以姦殺事巡道某力主之獄已具公審得其情惻然
曰典郡之謂何殺無辜以媚上司吾不爲也卒改其讞

大計舉卓異第一未及入覲以疾卒於官舍春秋六十
有四時乾隆二十年六月十九日也啟其橐無百金裝
巡撫以下咸歎息厚賻之公仕宦三十餘年宅心忠厚
未嘗有疾言遽色嘗題座右曰居官求有功無過無過
便是有功始在郎署有能聲及出典郡以治行受知
兩朝官雖不過四品然當世數良吏者必屈指及公昔
人著官箴言私罪不可有公罪不可無公前後屢絀吏
議起而復躡然未嘗有一私過也此可以爲賢矣其居
家孝友撫孤姪若已出叔弟某嘗知金壇縣罷官客死
江南公哭之慟遂得左臂偏枯之疾卒以是至不起公

諱祖悅字鍾冀別字敏齋先世有諱盛者自山東壽光
縣遷于代隸振武衛軍籍

皇朝雍正中省諸衛改隸州縣今爲代州人曾祖如京
廣東左布政使祖雲驢康熙丙辰進士翰林院編修禮
科給事中父歷康熙辛卯舉人刑部四川司主事公始
娶繼娶皆李氏女兄弟也三娶亦李氏皆
誥贈恭人四娶張氏生子三曰鄧乙酉選拔貢生日郝
廩膳生日邵國子監生五娶戈氏
誥封恭人生女子二偕夏邑縣舉人武潢國子監生徐
天駿初公在甘州恭遇

恩詔時張夫人主中饋例得封願讓封前妻曰前人皆
與君共貧賤且無子可無以少慰地下乎由是三前妻
得並贈親鄰皆賢張夫人云孤鄩等卜某年月日葬公
於某鄉某原先期來請銘銘曰
稽古治行大小馮君代郡之馮豈其苗裔耶自左布政
而下多以方面績聞堂堂雷州名達
至尊當世以爲殊遇何治之循而數之屯井惇旣安以
利嗣入千秋兮萬歲知有賢二千石之墳

山西分守冀寧道沈公墓誌銘

觀察沈公胚胎名族通曉時務起家州縣累擢監司與

上官意不合拂衣而歸優游鄉里者十有五載貴而不
驕鄉邦以爲矜式子比年假館吳門暇輒訪公談諧竟
日公長於子七歲而步履矍鑠勝子數倍常歎羨曰爲
地行仙今春示微疾捐館灑然若無累者公之子培嘗
從子游因請子志其墓子不得辭沈望出吳興而吳中
之沈尤蕃衍多達人公之先世明兵部郎中某以名德
祀鄉賢再傳至
皇朝翰林侍讀學士朝初公卽學
士曾孫歲貢生會虹之孫湖南零陵縣知縣華之子諱
之變字汝枚蔭園其號少隨父任溫清之暇兼習吏事
乾隆二十八年授河南獲嘉縣知縣三十年調祥符縣

三十五年遷許州知州四十年大計以卓異薦四十年引見記名卽擢山西寧武府知府四十五年調平陽府四十六年題陞分巡冀寧道以四十八年引疾歸里其卒以嘉慶三年三月三日春秋七十有八卽以其年七月十五日塋元配耿淑人繼配任淑人子五人塋坊壇培均孫十人秉銓秉鐸秉鉅秉鈐秉鑑秉鏐秉鎰秉鏡秉鉞秉鋸會孫一人公筮仕之始廉幹識大體尤習於刑名其在祥符以聽獄爲何恭惠公焯所知恭惠任臬使日它郡有疑讞多委公會鞫公亦爲盡力所平反甚衆其尤著者光州俞牛兒新野李拒弼二事牛

兒故無賴一夕村民阮志被竊控官言牛兒等夜行竊縛事主輸姦其婦州獲犯旣招伏矣公以昏夜行竊何由圖姦志被縛旣呼牛兒姓名當殺以滅口何又從容成姦再三詰之志詞窮始言牛兒實竊非姦乃鄰人慙恧欲重其罪以除害耳牛兒等遂得不死李拒弼者李閆氏之姪閆氏無子養拒弼爲嗣爲娶陳惟善女拒弼隱宮者也陳氏不安其室逃歸者數矣一日惟善送女至婿家還至中途女復趨至惟善憤怒縊殺其女并自縊焉縣役鄆純士者索賄於李弗得乃言閆氏與拒弼通令其兄閆國祥殺之縣令入其言掠治拒弼當抵極

刑獄已成矣公覆驗得其情白上司請釋三人而戍純
士縣令亦得罪乃有左袒新野令者謂公枉斷故出入
人罪蜚語播京師部臣卽以入告 詔提人犯令軍機
大臣與刑部會審公以原問官亦赴質詢及會讞日大
臣頗有爲新野令地者詰公詞色甚厲公極言珏瑀冤
狀申辨再三諸郎官驗珏瑀受刑傷痕經年不滅皆曰
殆天意也遂以實奏請如原斷而公治獄明恕聞於海
內矣公在許日臨穎有殺人獄已審正兇擬抵矣大吏
欲翻其案訊囚以好語誘之囚曰我實殺人不敢誣好
人乃止在山西再署按察使事秋讞多從輕比嘗曰罪

疑惟輕古之訓也我敢不勉乎公達於從政雖遇盤錯
恢乎有餘在豫日久最爲上官倚重亦未嘗曲意求合
其觀察冀寧入 覲日或勸以謁要人謝曰吾外吏秩
卑敢游卿相之門乎公五世祖兵部公久祀郡學鄉賢
闕百數十年而公之考繼之公乃勸建祖孫鄉賢祠以
志一門盛事又特爲學士建祠捐田八十畝以供烝嘗
易簣前七日猶親往宗祠致祭拜跪如禮其治家教族
周卹故舊多可稱者銘曰

吳興之望昌於吳世德趾美慶有餘懿哉觀察名實孚
親民司牧衆所愉雪冤肺石回瘡枯如唐徐杜漢張于

朱輻擁節腰銀魚年未七十賦遂初元豐十老入畫圖
鬱鬱佳城白日徂紀德示後久勿渝

大理府知府張公墓誌銘

乾隆五十有一年九月八日故大理府知府張公晴沙
卒於里第春秋八十有一先是婁東有七老人會皆縉
紳歸田德望可矜式者當時比諸睢陽洛下之盛及子
來主講席則諸老已凋落惟廬州守王公容齋與公歸
然無恙每風日晴朗輒從二老游公眉目秀偉衣冠肅
整望而知為有道之士尤熟於鄉邦文獻口講指畫無
異目睹雖年臻耄耋未嘗有謬誤語子益敬而親之乃

未及二年而容齋先歿公亦繼逝老成淪喪子益俛俛
無所之矣悲夫越三年孤子惇等卜以某月日葬公於
某鄉之原先期乞子文刻之穿中公良吏於法宜銘且
與子雅故其何敢辭按狀公諱瞻洛字文江號晴沙世
為太倉州人明南京工部尙書輔之之六世孫尙書生
候選訓導洪洪生慶都縣丞凝道凝道生儀徵教諭元
薦元薦生州學生垚垚生議敘州判舉孝廉方正閏則
公之考也公始孩而失母事父及繼母能得其歡心未
弱冠能文以國學生應南北試數薦不售乃援例入選
得湖北安陸府通判分駐沔陽之新堤其地四面環水

濬在堂文集 卷四十七
豪民編木截流而漁水益激怒舟楫多致覆溺公親往
撤之行旅稱便嘗奉檄勘潛江水災所至饑民載道郡
守欲匿不以聞公曰是可忍安用民牧乎卽馳詣大府
言狀得入告振卹丁母憂服除補河南彰德府通判彰
德糧甲於中州官吏不能檢束旂丁因以需索公至則
預告有漕州縣嚴飭家人胥吏絲毫毋擾由是旂丁無
生事者在任十年署府事者四攝州縣者三嘗奉檄至
陽武督賑而饑民千數蠶聚縣治縣令倉卒無措公輕
騎往呼其耆老使前曉以利害因出散賑款目示之咸
唯唯而去賑事甫畢而河工徵稽料之檄又至縣令益

窘夜謁公曰縣境被水安所得此公曰此易與耳頃在
賑所見大戶儲料頗多若酬其直而善諭之雖百萬可
立致也卽出示所屬果如期而辦其署汲縣也適河東
商人乏鹽假長蘆鹽行銷各官皆有餽遺公獨固却之
旣而歐陽觀察永祺舉其事監司以下得罪者八人唯
公一無所染其署歸德也部檄採買黑豆三十萬石公
以積歉之後派買獨多力請於上官得減五萬民皆德
之遷雲南大理府知府過闕請 訓奏對稱 旨到官
律已以廉馭下以法輯睦文武撫綏土司甚得吏人之
和府倉貯兵糧二萬餘石每歲諸縣糧戶自運交納公

念其遠來隨到卽收且令人自執槩各攜餘糧以歸僉
謂向來所未有也他如修學宮興書院革鑄錢攬砂之
弊嚴洱海巨綱之禁皆足爲後來法爲忌者所中被劾
落職歸裝唯攜點蒼石二枚而已所居爲桑民憚先生
故宅水石竹木頗深秀春秋佳日與賓朋羣從觴詠其
閒蕭然有世外之想兩遇萬壽慶典得復元官而
公以年老不能復出矣元配陳恭人於子爲中表姊先
卒子梈乾隆庚子舉人詠葵太學生皆側室張瑞人出
女三人長適錢荃次適俞佩聲次適蔣載孫寶熊吉燕
仁煦俱幼銘曰

吏二千石令長之率兮苟民譽之母失雖去其官奚恤
兮言歸家園樂耆年兮曲江風度儼神仙兮天與善人
有子而賢兮我銘其室曰是惟良吏之阡兮

凌竹軒墓誌銘

君姓凌氏諱存淳字鯤游竹軒其別字居松江之上海
縣大父直齋父蒼山俱尚義有隱德以君貴贈朝議大
夫母黃生母何皆封太恭人君少而沈靜嗜學補縣學
生肄業成均文譽籍甚族父兵部侍郎榆山公深器重
之年三十三筮仕得府同知掣籤赴廣東試用屢署要
職題補雷州府同知以廉明善決獄爲督撫所知在粵

潘石室文集 卷四十七
先後十有三年署縣事者四署州事者一署府事者五
署同知者三通判者二而於雷州本任莅事纔數月蓋
多試之繇劇不欲久置散地也初署永安閱舊牘甲訴
乙賴婚之言吾女許字甲次子而甲欲妻其長子故不
願及庭鞫召二子至長醜而次美閱女年帖又與長者
相若以詰乙則言兒女昏嫁年歲不必同且長幼亦不
相懸媒氏又助乙證成之因諭曰汝兩家各執一辭婚
姻天定吾爲女決之於天書爾名置盤中令乙探之探
得者卽女婿乙對天虔禱取一紙啟視之甲長子也遂
伏罪歎曰天果不可強也署番禺時有馮甲兄弟餓張

丙屋奉母同居一日以小故相訾馮不能勝則訟言張
毆其母君往驗無傷遣出越數日忽言傷重殞命驗之
仍無傷痕而得服毒死狀僉謂馮鳩母以陷張矣君意
小嫌不至此問馮家尚有何人云弟有二子皆童卯召
至內署緩詞問之則云大母素苦腹痛近得一方酒沖
鷓鴣糞可療飲之經宿死君因悟曰此鴿食斷腸艸糞
中有毒其母適中之耳遂破械出之有巡撫吏訟佃戶
欠租訊之無實乃吏利其產欲占之君勃然曰此風不
可長卽重笞之而告于巡撫岳公濟岳公曰凌君洵健
吏立命革役荷校以徇省城肅然其署潮陽也有甲竊

乙漁網事露反言乙竊其網已追獲之前令未之決以網存官庫君召兩造問網有識乎乙言損左一角甲不能對出網驗之果如乙言乃扶甲而還乙其剖斷明敏多此類君既以才能累擢大郡會瓊州守缺總督蘇公將特疏舉薦先檄在事君念太恭人年已八旬亟繳檄請終養上官交畱之辭益力遂歸杜門不出者二十年事黃何兩太恭人生養喪葬必誠必信祥禱甫畢有司檄令赴補遂以足疾辭下帷却埽不與外事嘗舉先儒言居官不受一人屬居家不以一事屬人書於齋壁論者以爲不媿斯言性好施予厚於桑梓而薄于游客衣

冠動作必依乎禮法有姍家子著新履頗詭異君見之曰此優伶所尚非良家子弟可用亟令易去好吟詠兼善學策大字題榜尤工注於康熙五十二年九月丙辰歿於乾隆四十五年九月某日春秋六十有八娶俞宜人孝謹勤儉曰首相敬無間言子鏡心松江府學增廣生松心上海縣學生復心國子監生女一適國子監生黃珏孫男九人女七人鏡心等將以壬寅歲正月某日卜葬新阡先期屬予銘之其詞曰

學優而仕政平訟理愛人約已廉可師兮將莅瓊海陳情引退養志匪懈孝無違兮老氏知足孟氏寡欲葛氏

抱朴兼有之兮申江漣漣鬱鬱新阡先生藏焉名永垂
兮

小

黃莊莊與此人丈士人難心辨辨以壬寅歲五月某日
主外心士善學學主與心圖于溫主文一
人幸善惟愈曰首休造無間言于難心外士
與外算到四十五平水月某日春林六十百八
善學算大字賦賦此工主外與照五十二平水月
曰此對分祇尚非真寒于策可用亟令是去我
賦賦外心外平斷去首賦寒于善惟與與是良之

